
प्रमुख समाचार –

- प्रधानमंत्री नरेंद्र मोदी ह “प्रधानमंत्री-गतिशक्ति राष्ट्रीय मास्टर प्लान” के तीन बछर पूरा होय के करीन सराहना – एखर ले भारत के बुनियादी ढांचा ल मिलही नवा स्वरूप।
- गौरेला-पेण्ड्रा-मरवाही जिला म पुलिस ह दशहरा के अवसर म रावण दहन कार्यक्रम के दौरान हजारों लोगन मन ल साइबर सुरक्षा ल लेके दिलाइन सपथ।
- जशपुर जिला के पत्थल गांव म पाछू रतिहा सड़क हादसा म तीन ज्ञन के मौत होगे – उन्हें, एक ठन सड़क हादसा म पुलिस कांस्टेबल के मौत।

प्रधानमंत्री-गतिशक्ति योजना

प्रधानमंत्री नरेंद्र मोदी ह “प्रधानमंत्री-गतिशक्ति राष्ट्रीय मास्टर प्लान” के तीन बछर पूरा होय के सराहना करत हुए किहीन कि ए पहल ह भारत के बुनियादी ढांचा ल नवा स्वरूप दे म महत्वपूर्ण भूमिका निभाय हे। एक ठन सोसल मीडिया पोस्ट म श्री मोदी ह किहीन कि गतिशक्ति ह मल्टीमॉडल कनेक्टिविटी म महत्वपूर्ण वृद्धि करे हे अउ अलग-अलग क्षेत्र के तीव्र अउ कारगर विकास ल सुनिश्चित घलो करे हे। प्रधानमंत्री ह यहू किहीन कि गतिशक्ति के विकसित भारत के सपना ल साकार करे म गति मिलत हे अउ एखर ले प्रगति, उद्यमिता, अउ नवाचार ल बढ़ावा मिलही।

राज्यपाल-अग्रसेन जयंती

राज्यपाल रमेन डेका ह आज रायपुर म आयोजित अग्रसेन जयंती समारोह म मुख्य अतिथि के रूप म सामिल होइन। समारोह ल संबोधित करत राज्यपाल ह किहीन कि छत्तीसगढ़ के विकास म अग्रवाल समाज के अहम भूमिका हे। उद्योग मनके विकास, शिक्षा अउ स्वास्थ्य के क्षेत्र म ओखर योगदान अउ समाज सेवा के भावना प्रशंसा के योग्य हे। छत्तीसगढ़ के सामाजिक अउ आर्थिक संरचना म अग्रवाल समाज ह अपन अमिट छाप छोड़े हे। राज्यपाल ह किहीन कि समाज के अंतिम व्यक्ति के उत्थान करे ले देस के उत्थान होही। समारोह म विशिष्ट योगदान देवइया सामाजिक विभूति मन ल राज्यपाल ह सम्मानित करीन। कार्यक्रम म विशिष्ट अतिथि के रूप म रायपुर सांसद बृजमोहन अग्रवाल घलो मौजूद रिहीन।

मुख्यमंत्री दशहरा समारोह

मुख्यमंत्री विष्णुदेव साय ह काली रायपुर के डब्ल्यू आर.एस. कालोनी म आयोजित दसहरा कार्यक्रम म सामिल होइन। कार्यक्रम ल संबोधित करत मुख्यमंत्री ह किहीन कि ए परब असत्य उपर सत्य अउ बुराई उपर अच्छाई के जीत के परब आय। ओमन किहीन कि माता कौशल्या के नगरी अउ भांचा श्रीराम के ननिहाल छत्तीसगढ़ म रावण रूपी जउन भी बुराई हे, ओला हम सब ल मिलके दूर करे के संकल्प लेना होही। मुख्यमंत्री ह ए मउका म रावण कुंभकरण अउ मेघनाथ के पुतला के दहन करीन। एखर बाद मुख्यमंत्री विजयादसमी के मउका म दूधाधारी मठ, रावणभाठा के दसहरा मैदान म आयोजित रावण दहन कार्यक्रम म घलो सामिल होइन। ए अवसर म मुख्यमंत्री ह रावणभाठा दसहरा मैदान के सौंदर्यीकरण अउ ओला व्यवस्थित करे बर पचास लाख रुपिया रासि देके घोसना घलो करीन।

बस्तर दशहरा

पचहत्तर दिन ले जारी बस्तर दशहरा अब अपन अंतिम चरण म पहुंच चुके हे। बस्तर दशहरा के तहत आज भीतर रैनी विधान के निर्वहन करे जाही। भीतर रैनी विधान के तहत मां दंतेश्वरी के छत्र ल विधि विधान पूर्वक पूजा अनुष्ठान के बाद दू मंजिला रथ के जरिया सीरासार चौक, गोलबाजार चौक अउ मिताली चौक होवत सिंह ड्योढ़ी पहुंचाय जाही। एखर बाद मां जी के रथ ल मां दंतेश्वरी मंदिर म रखे जाही। बस्तर दशहरा के तहत काली बाहर रैनी के परंपरा के विधान संपन्न होही।

साइबर-संकल्प

गौरेला पेण्ड्रा मरवाही जिला म पुलिस ह दशहरा के अवसर म रावण दहन कार्यक्रम के दौरान हजारों लोगन मन ल साइबर सुरक्षा ल लेके संकल्प दिलाइन। जिला के पुलिस अधीक्षक भावना गुप्ता किहीन कि असत्य उपर सत्य के जीत असन साइबर फ्रॉड रूपी बुराई उपर सतर्कता के अच्छाई ह जीत दिलाही। साइबर जागरूकता पखवाड़ा के सेल्फी पाइंट म घलो लोगन मन बिसेस रूची देखाइन अउ सेल्फी प्वाइंट म फोटो खिंचवा के खुसी जाहिर करीन।

दुर्घटना

जशपुर जिला के पत्थल गांव म पाछू रतिहा सड़क हादसा म तीन इन के मौत होगे। पुलिस के मुताबिक ए सबो इन दसहरा म आयोजित नाटक देखके घर लहुटत रिहीन। इही बेरा ग्रामीण मन ल लेके जात ट्रैक्टर अनियंत्रित होके पलट गे, जेखर ले घटना स्थल म ही दू इन महिला समेत तीन इन के मौत होगे। फेर छै ले जादा इन घायल होगे हे। घायल मन ल सिविल अस्पताल पत्थलगांव म भर्ती कराय गेहे, जिहां उंखर ईलाज चलत हे।

उहें, मुंगेली जिला के बोरड़तरा गांव म अनियंत्रित पिकअप ह पुलिस कांस्टेबल ल टक्कर मार दीस। ए हादसा म कांस्टेबल के मउका म ही मौत होगे। पुलिस कांस्टेबल के पहिचान प्रशांत मसीह के नाम के रूप म होय हे। बताय जात हे कि आरक्षक प्रशांत मसीह दसहरा कार्यक्रम के ड्यूटी ले लहुटत बेरा हादसा के सिकार होगे।

ओति, जांजगीर-चांपा जिला के तरौद गांव म सड़क हादसा म एक इन महिला के मौत होगे। बताय जात हे कि तेज रफतार ट्रैलर ह ए महिला ल अपन चपेट म ले लीस, जेखर ले मउका म ही ओखर मौत होगे। घटना के बाद ग्रामीण मन घटना स्थल म तीन घंटा तक चक्काजाम करीन। पुलिस अउ प्रशासन के समजाइस के बाद ग्रामीण मन चक्काजाम खतम करीन। ऐति, बिलासपुर जिला के बेलगहना म ईटा परिवहन के दौरान ट्रैक्टर पलटे ले एक इन ग्रामीण के मउका म ही मौत होगे। उहें, दू इन घायल होगे। घायल मन ल उपचार बर अस्पताल म भर्ती कराय गेहे।

एंबुलेंस-सेवा

बस्तर विकास प्राधिकरण के उपाध्यक्ष अउ कोंडागांव विधायक लता उसेंडी ह आज जिला अस्पताल परिसर ले दू ठन नवा एंबुलेंस ल हरी झंडी देखाके खाना करीन। ए एंबुलेंस ल जिला के माकड़ी अउ फरसगांव विकासखंड के बड़े डोंगर क्षेत्र म संचालित करे जाही। एमा ले एक ठन एंबुलेंस म लाइफ सपोर्ट सिस्टम के सुविधा घलो उपलब्ध हे, जउन ह गंभीर मरीज मन बर कारगर साबित होही।

सरस मेला

जगदलपुर के लालबाग मैदान म काली बारह अक्टूबर ले बस्तर मड़ई अउ क्षेत्रीय सरस मेला सुरू होगे हे। उन्नीस अक्टूबर तक चलइया ए मेला के सुभारंभ वनमंत्री केदार कश्यप ह करीन। ए मेला म शासकीय योजना उपर आधारित प्रदर्सनी अउ स्व-सहायता समूह डहार ले उत्पादित वस्तु मनके प्रदर्सनी अउ बिक्री करे जात हे। मेला म कई ठन जिला के स्व-सहायता समूह मनके हस्तसिल्प, कृषि उत्पाद, जैविक खाद्य पदार्थ, कपड़ा अउ दूसर स्थानीय वस्तु मनके प्रदर्सनी घलो करे गेहे।

सुभारंभ समारोह ल संबोधित करत हुए वन मंत्री ह किहीन कि ग्रामीण अर्थव्यवस्था ल मजबूत बनाय बर लगाय गे सरस मेला स्थानीय उत्पाद मन ल बाजार उपलब्ध कराय अउ महिला अउ ग्रामीण समुदाय मन ल सशक्त बनाय के माध्यम आय। समारोह ल बस्तर सांसद महेश कश्यप अउ विधायक किरण सिंह देव ह घलो संबोधित करीन।

चेन स्नेचिंग-महिला गिरफ्तार

जशपुर जिला के पत्थलगांव पुलिस ह दुर्गा विसर्जन के दौरान चेन स्नेचिंग करइया दस इन महिला मन ल गिरफ्तार करे हे। कुसमी गिरोह के ए आरोपी महिला मन करा ले पुलिस ह आठ टन मंगल सूत्र बरामद करे हे। ए महिला मन अलग-अलग क्षेत्र म चोरी के घटना ल अंजाम देहे। जिला के पुलिस निरीक्षक शशि मोहन सिंह ह बतइन कि पत्थलगांव म दुर्गा विसर्जन के दौरान सात इन महिला मनके गला ले चेन चोरी होय के सूचना मिले रिहीस। सीसीटीवी फुटेज के आधार म जब ए मामला के जांच करे गीस त, वीडियो म कुछ महिला मन चेन स्नेचिंग करत नजर अइन। एखर आधार म पुलिस ह दस इन महिला मन ल गिरफ्तार करे हे।

संक्षिप्त समाचार

- वित्त मंत्री ओपी चौधरी ह काली रायगढ़ म करीब तेरह करोड़ रुपिया के निर्माण काम के भूमिपूजन करीन।
- बलरामपुर जिला के महेवा गांव म दुर्गा विसर्जन के दौरान एक इन युवक के बूड़े ले मौत होगे।
- धमतरी पुलिस ह नौकरी लगाय के नाम म करीब सोलह लाख रुपिया के धोखाधड़ी करइया एक इन आरोपी ल गिरफ्तार करे हे।
- बेमेतरा पुलिस ह नवागढ़ म किसान मन संग इक्कीस लाख रुपिया के धोखाधड़ी करइया आरोपी ल गिरफ्तार करे हे।
- कोरबा जिला के ग्राम लालपुर म पाछू रतिहा हाथी के हमला ले एक इन नोनी घायल होगे।
